



Komunikadu Imprensa
13 Marsu 2015

JSMP marka audiénsia ho Sua Exelénsia Primeíru Ministru: Setór Justisa kompleksu liu

Iha 12 Marsu 2015, Ekipa Judicial System Monitoring Programme-JSMP kompostu husi Diretór Ezekutivu JSMP, Adjuntu Diretór, Koordinadora Peskiza Legál, Koordinadora Justisa ba Feto no Labarik, Koordinador Relasaun Públiku no Ofisial Media JSMP, marka audiénsia ho Sua Exelénsia Primeíru Ministru (PM) Dr. Rui Maria Araújo ne'ebé akompaña husi Asesor ba Asuntu Sosiedade Sivil & Media Gabinete Primeíru Ministru, iha Palasiu Governu.

Audiénsia ne'e ho objetivu atu introdus JSMP nia servisu, apresenta JSMP nia hanoin relasiona ho kestaun sira kona-ba importansia hosi prinsipiui independénsia judisiáriu, separsaun poder, asesu ba justisa, seguransa no bem-estar ba autóridade judisiáriu no implikasaun rezolusaun sira hosi Parlamentu Nasional (PN) no Governu kona-ba espulasaun autór judisiáriu internasional sira ba dezvoltamentu setór justisa.

Alende ne'e, JSMP mós husu ba Sua Exelénsia PM atu explora opsaun atu restora fali koperasaun servisu ho Portugal no Estadu CPLP sira seluk atu kontinua apoiu no investe iha Centru Formasaun Judisiáriu.

Iha oportunidade ne'e, JSMP mós husu ba Sua Exelénsia PM atu koalia ho parseriu dezvoltamentu sira hodi kontinua fo prioridade ba dezvoltamentu setór justisa. Iha tempu hanesan JSMP mós hatoo ba Sua Exelénsia PM katak agora dadaun JSMP prepara hela submisaun ba PN kona-ba alterasaun ba Kodigu Penál no Lei Kontra Violénsia Doméstika hodi proteze diak liu feto no labarik sira iha Timor-Leste.

Antes responde ba preokupasaun hirak ne'e, Sua Exelénsia Primeíru Ministru, agredese ba JSMP tanba JSMP halo ninia papél ne'ebé importante hodi tau matan ba setór justisa.

Sua Exelénsia Primeíru Ministru esplika pontus balu liga ho kestaun atu halo mudansa no halo lei foun ruma iha tempu badak ne'e defisil, tanba kestaun efetividade servisu Parlamentu Nasional no tempu limitadu tebes.

Relasiona kestaun independénsia judisiáriu PM haktuir katak setór justisa persiza apoiu no investe liutan intermus kapasidade rekursu umanu. Tuir PM katak atu garantia prosesu ida ne'ebé qualidade tenke iha rekursu ne'ebé suficiente no iha kapasidade hodi halo prestasun servisu

justisa ne'ebé qualidade no efikas. Liu-liu PM rasik iha nia impresaun rasik katak setór justisa ne'e kompleksu no persiza hadia qualidade teknika hosi autór judisiáriu sira.

PM konkorda katak importante no persiza tebes atu organiza debate públiku ida hodi konvida orgaun estadu sira hodi bele esplika no klarifika ba públiku saida mak sai hanesan impedementu ba orgaun estadu ida-idak sira nia servisu.

Enkontru ne'e ensera ho entrega JSMP nia publikasaun sira hanesan "Rezulusaun Parlamentu no Governu kona-ba Demisaun ofisiál internasional sira no asesór sira iha setór judisiáriu Timor-Leste, Relatóriu Bem-Estar" ba Autór Judisiáriu, no sumáriu Submisaun JSMP kona-ba alterasaun ba Kódigu Penál.

Atu hetan informasaun liutan bele kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
Telefone:3323883 | 772957